

23 JUL 1998

MoU-Koperasi

ACM METERAI MoU DENGAN ENAM KOPERASI DI JOHOR

JOHOR BAHRU, 23 Julai (Bernama) -- Automotive Corporation (Malaysia) Sdn Bhd (ACM), anak syarikat DRB-Hicom Bhd, akan memberi peluang kepada koperasi untuk menjadi pengedar trak nasional "Hicom Perkasa".

Ketua Pengarah Eksekutif ACM, Bhaskaran Pillai, yakin menerusi memorandum persefahaman (MoU) yang dimeterai hari ini akan dapat membantu koperasi memperluaskan lagi skop perniagaannya.

Usaha sama ini akan dapat meningkatkan pendapatan koperasi di samping memberi peluang pekerjaan kepada anggota koperasi, katanya ketika berucap pada majlis MoU antara ACM dengan enam buah koperasi di negeri Johor di sini.

Enam buah koperasi itu ialah Koperasi Peneroka Felda Mas Berhad, Koperasi Peneroka Felda Sungai Sayong Berhad, Koperasi Peneroka Rancangan Felcra Batu 67 Kluang Berhad, Koperasi Pekebun Getah Daerah Muar Berhad, Koperasi Permodalan Melayu Negeri Johor Berhad dan Koperasi Kemajuan Tanah Negeri Johor Berhad.

Turut menyaksikan MoU itu ialah Menteri Tanah dan Pembangunan Koperasi, Tan Sri Kasitah Gaddam dan Ketua Pengarah Jabatan Pembangunan Koperasi, Mustapha Mohd Zain.

Bhaskaran berkata koperasi juga akan diberi peluang membuka pusat servis dan alat ganti bagi kenderaan trak nasional itu.

"ACM akan menyediakan latihan teknikal kepada bakal-bakal mekanik yang terdiri daripada anggota koperasi serta menempatkan seorang eksekutif di setiap koperasi untuk bertindak sebagai penasihat," katanya.

Katanya, ini merupakan langkah pertama ACM dalam usaha pemasaran yang lebih agresif dan berharap usaha sama seumpama itu akan dapat diperluaskan dengan koperasi di seluruh negara.

Setakat ini ACM mempunyai 16 cawangan dan 54 pengedar yang sah di seluruh negara dengan angka jualan sebanyak 10,000 buah bagi tempoh dua tahun kebelakangan ini.

Trak "Hicom Perkasa" dilancarkan oleh Perdana Menteri Datuk Seri Dr Mahathir Mohamad pada 11 Nov 1997 dan mempunyai ciri-ciri inovatif yang memenuhi keperluan pelanggan kenderaan komersil jenis "Light Duty".

-- BERNAMA

BH oba